

**ՀԱՅՏԱՐԱՐՈՒԹՅՈՒՆ ՓԱՍՏԱՀԱՎԱՔ ՀԱՆՁՆԱԺՈՂՈՎԻ ԱՆԴԱՄՆԵՐԻ
ԸՆՏՐՈՒԹՅԱՆ ՄՐՑՈՒՅԹԻ ՎԵՐԱԲԵՐՅԱԼ**

2025-10-30 17:47:47

Հայտատու	Վարչապետի աշխատակազմ
Տեսակ	Փաստահավաք հանձնաժողովի անդամի ընտրություն
Հիմք	«Հանրային խորհրդի մասին» ՀՀ օրենքի 11.11 հոդվածի 2 մաս

Վարչապետի աշխատակազմի Հանրային խորհրդի քարտուղարությունը, ղեկավարվելով «Հանրային խորհրդի մասին» օրենքի 11.11-րդ հոդվածի 2-րդ մասով և ՀՀ կառավարության 2025 թվականի օգոստոսի 14-ի N 1128-Լ որոշմամբ հաստատված կարգով, Փաստահավաք հանձնաժողովի անդամների ընտրության նպատակով՝ (Փաստահավաք հանձնաժողովի անդամի գործունեության համար ամսական վճարի չափ սահմանված է 665.000 դրամը՝ ներառյալ օրենսդրությամբ սահմանված հարկերը:) հայտարարում է մրցույթ:

1. Հանձնաժողովի անդամի թեկնածու կարող են առաջադրել այն ոչ առևտրային կազմակերպությունները, որոնց կանոնադրական նպատակներից են մարդու իրավունքների պաշտպանությունը, փաստահավաք գործունեությունը, համապետական և տեղական ինքնակառավարման մարմինների ընտրությունների և հանրաքվեների կազմակերպմանը և անցկացմանը, հետընտրական գործընթացներում տեղի ունեցած քաղաքական հետապնդումներին, պետության կարիքների անվան տակ, ինչպես նաև հանրության գերակա շահերի ապահովման նպատակով սեփականության օտարումներին, անձանց սեփականության իրավունքից զրկելու այլ դրսևորումներին, ոչ մարտական պայմաններում զինծառայողների մահվան և հավաքների ազատության իրավունքի խախտումների դեպքերին անդրադարձը կամ դրանց բացահայտման ուղղությամբ ծավալած գործունեությունը, և որոնք վերջին հինգ տարիներին իրականացնում են նման գործունեություն:

Կազմակերպություններին ներկայացվող պահանջներին բավարարելու հանգամանքը հաստատելու նպատակով կազմակերպությունը ներկայացնում է՝

- կազմակերպության պետական գրանցման վկայականի պատճենը.
- կազմակերպության կանոնադրության պատճենը.
- հայտը ներկայացնելու պահին նախորդող հինգ տարիների գործունեության տարեկան հաշվետվությունների պատճենները.
- առկայության դեպքում կազմակերպության հանձնաժողովի իրավասության ոլորտներում ծավալած գործունեության արդյունքում կազմված զեկույցների և այլ

աշխատանքների մասին տեղեկատվություն:

2. Փաստահավաք հանձնաժողովի անդամի թեկնածու կարող է լինել այն անձը, որը՝

- ունի բարձրագույն կրթություն և տիրապետում է հայերենին,
- Հայաստանի Հանրապետության քաղաքացի է,
- ունի առնվազն հինգ տարվա մասնագիտական փորձառություն հանձնաժողովի իրավասության ոլորտներում,
- օժտված է բարձր մասնագիտական որակներով, իր ոլորտի հեղինակավոր մասնագետ կամ հանրային հեղինակություն վայելող անձ է,
- մինչև հանձնաժողովի անդամ ընտրվելը չի զբաղեցրել «Հանրային ծառայության մասին» օրենքով նախատեսված որևէ քաղաքական պաշտոն և իր մասնագիտական գործունեության ընթացքում դրսևորել է քաղաքական չեզոքություն և զսպվածություն:

Թեկնածու առաջադրելու հայտերը (կցվում է) Կազմակերպությունները ներկայացնում են սույն հայտարարության հրապարակվելու հաջորդ օրվանից սկսած՝ տասնհինգօրյա ժամկետում՝ կցելով հետևյալ փաստաթղթերը և տվյալները՝

- 1) թեկնածուի անձը հաստատող փաստաթղթի պատճենը և էլեկտրոնային փոստի հասցեն.
- 2) թեկնածուի կենսագրությունը (այդ թվում՝ մասնագիտական գործունեության նկարագրությամբ) և ծավալած գործունեության վերաբերյալ տեղեկությունները.
- 3) թեկնածուի գրավոր համաձայնությունը՝ կազմակերպության կողմից որպես թեկնածու առաջադրվելու և իր վերաբերյալ ներկայացված տեղեկությունները Հանրային խորհրդի կամ Կառավարության պաշտոնական համացանցային կայքում հրապարակելու մասին.
- 4) բարձրագույն կրթության որակավորման աստիճանի առկայությունը հավաստող փաստաթուղթ.
- 5) հայերենին տիրապետելու հանգամանքը հավաստող փաստաթուղթ.
- 6) մասնագիտական աշխատանքային փորձառությունը հավաստող փաստաթղթեր.
(մասնագիտական աշխատանքի փորձառություն է համարվում սույն հայտարարության 1-ին կետում թվարկված ոլորտներում գործունեության իրականացումը)
- 7) առկայության դեպքում հրապարակումների, գիտական աշխատությունների, մասնավորապես, գիտական հոդվածների, մենագրությունների, ատենախոսությունների, ձեռնարկների կամ այլ աշխատանքների լուսապատճենները և ցանկը՝ առկայության դեպքում՝ դրանց հղումներով.
- 8) թեկնածուի կողմից ներկայացվող հայտարարություն (կցվում է).

9) թեկնածուի նախաձեռնությամբ՝ այլ փաստաթղթեր:

Փաստաթղթերը ներկայացվում են Էլեկտրոնային եղանակով՝ publiccouncil@gov.am Էլեկտրոնային փոստին (հեռ. 010 51-56-19)՝ ստորագրված և լուսապատճենված կամ Էլեկտրոնային թվային ստորագրությամբ:

Հայտը և կից ներկայացված փաստաթղթերը թերի լինելու կամ անհրաժեշտ փաստաթղթերի ցանկին չհամապատասխանելու դեպքում կազմակերպությունը դրա մասին ծանուցվում է երկու աշխատանքային օրվա ընթացքում (հեռախոսով կամ Էլեկտրոնային փոստով), և տրամադրվում է մինչև երկու աշխատանքային օր թերությունները շտկելու համար:

Սահմանված ժամկետում թերությունները չշտկելու դեպքում ներկայացված հայտին ընթացք չի տրվում:

[Հայտ.pdf](#)

[Հայտարարություն.pdf](#)

37410515619

publiccouncil@gov.am

Կառավարական տուն 1